

«Ün sentimaint i’l vainter m’ha dit: Quai pudess funcziunar»

In avrigl ha l’architect da renom Peter Zumthor preschantà in Val Müstair il proget per üna nouva Tessanda. L’abitacul vess da gnir fabrichà fin dal 2028 immez Valchava. Ma il motor davo il proget es Maya Repele, daspö set ons mainagestiun da la Tessanda. Ün discuors davart sentimaints i’l vainter ed ils squitschs finanzials.

Id es üna da las surpraisas grischunas dals ultims mais. La venerabla Tessanda Val Müstair – chi chüra ün artischanadi vegl da duonnas – voul fabricchar insembel cul cuntschaint architect Peter Zumthor a Valchava ün nouv lavuratori cun butia e bistro. Cun cuosts da versesch milliuns es la nouva Tessanda ün mega proget pella pitschna Val Müstair. La persuna chi ha inizià quel e chi tira il char es Maya Repele, daspö il 2018 madra da l’instituziun.

FMR: Maya Repele, quantas chartas ha Ella miss sün posta quist ultim mais?
Maya Repele: Davo la preschantaziun dal proget n’haja tschüf blers e-mails, SMS e telefons da glieud chi ha gratulà o chi ha gnü plaschair pella Val Müstair e la Tessanda. Ed a tuot quels resuns n’haja provà da respunder.

Ma a la preschantaziun dal proget per üna nouva Tessanda in avrigl ha Ella dit cha davo Pasqua as vögla cumanzar a trametter dumondas da sustegn.
Precis. Ma insè vaina cumanzà cun quai fingià l’on passà, vain tramiss var 30 dumondas. Però quels chi han respus, laivan tuots savair plü precis che cha nus fain insomma, i laivan verer ün proget. Uossa, davo la preschantaziun dal proget restaina landervia. In üna prüma fasa esa da pensar grond – voul dir cun far plütost pacas dumondas ad instituziuns, fundaziuns e persunas privatas, ma per la paja pensond vi da sommas plü otas. Tras quai vessan nus plü adura üna sgürezza per planisar inavant. Il bôt füss insè da finanziair l’interproget cun raps externs, sainza stuvair tour sü ün credit bancar e tras quai inchargiar in avegnir la gestiun. Uschea pudess eir eu surdar lura ün bel di ad üna successura la Tessanda sainza «grondas ipotesas», i’l vair sen dal pled.

Che cifra scrivais vus insomma illa dumonda da sustegn? La Tessanda quinta tenor la documentaziun da fabrica cun 7,5 milliuns. L’architect Peter Zumthor ha discurrü in avrigl d’ün proget da var desch milliuns.
Id es natüralmaing greiv da dir in quist stadi da la planisaziun üna cifra precisa. Peter Zumthor fa 40 pertschient da tuot las lavurs architectonicas, voul dir impustüt la creaziun e concepziun da l’edifi. Las ulteriuras lavurs – tuot ils plans d’execuziun o la direenziun da fabrica – fa ün oter büro cun experienza per progets gronds. Ils duos büros ston uossa sezzer vi d’üna maisa e far oura ils quints! Però nus lessan tegner in frain tuot ils cuosts,



Maya Repele maina daspö ses ons la gestiun da la Tessanda Val Müstair – ed ella es il motor davo il proget per realisar a Valchava ün nouv edifiz per l’instituziun chi pudarà festagiar dal 2028 seis 100avel anniversari.
fotografia: Mayk Wendt/Tessanda Val Müstair

perquai cha nus lessan ün fabricat simpel sainza luxus, sainza climatisaziun e s-chodamaint da fuond.

I dà minchatant vuschs chi dischan cha da lavurar cun Peter Zumthor – chi ha ideas cleras – nu saja tant simpel, güsta in connex culs cuosts da fabrica. Ella es sgür gnüda admonida plüssas jadas?
Schi, da quellas admoniziuns n’haja tschüf diversas – chi saja spinus da collavurar cun el, e lura eir pervi dals cuosts. Ma mias experienzas fin uossa sun stattas tuottafat l’incuntrari. Las curellas nu tuornan. El es fich amiaivel e cooperativ ed il proget es intant bler plü progredi co quai cha nus vaivan spettà. Eu sun fich ingrazchaivla e satisfatta da la collavuraziun.

Perche vairamaing güsta Peter Zumthor sco architect?
Cur ch’eu sun rivada pro la Tessanda, avant var desch ons, lura vaiva l’instituziun vers inoura ün prestige plütost bass. Ella gniva suvent resguardada sco üna sort officina protetta chi tessa ün pèr süaintamans. Il tesser vaiva paca stima. Ed a quel purtret vaina vulglü far frunt, uossa cun ün fabricat e cun ün architect da vaglia. Nus ans vessan eir pudü imaginar bain da collavurar cun üna duonna architecta, forsa eir cun üna persuna plü giuvna. Ma lura vessan nus stuvü organisar üna concorrenza d’architectura ed ir aint ün tschert risch e precis dūrant quel temp es Peter Zumthor gnü per cas in visita illa Tessanda, al di da las portas avertas.

Voul dir ch’el es gnü da sai oura – e na sün invid da la Tessanda?
Schi, el es stat quia cun confamigliars. Nus vain fat cugnuschentscha ed eu til n’ha guidà tras nossa chasa. Davo

quel inscunter suna ida a chasa, n’ha consultà qualche cudeschs d’architectura ed ün sentimaint i’l vainter m’ha dit: Quai pudess funcziunar – eir perquai ch’eu sa cha Peter Zumthor ha üna grond’affinità pel artischanadi e la mansteranza. Eu n’ha subit eir gnü il sentimaint cha la collavuraziun cun ün tal architect da renom pudess far üna fin al spredschi pella Tessanda. Eu d’eira sgüra cha Zumthor concepiss ün edifiz adattà per nus. Perquai til n’haja scrit üna charta e provà da far gust per nos proget. Pacs dis plü tard n’haja fingià tschüf risposta ed ün invid da gnir in seis büro a Haldenstein. Là m’ha el lura declerà dad esser pront da concepìr per nus ün nouv dachasa.

Il plan es ambizius: Amo quist on lessat vus avair insembel la finanziaziun e la stà 2028 vess da star il nouv abitacul a Valchava. Massa ambizius?
Schi, quai es sportiv. Ma eu sun propa persvasa chi funcziuna – e farà perquai tuot meis pussibel. Però, i’s bada uossa eir il squitsch, e quel nun es pitschen.

Causa la dimensiun da l’edifiz d’ouvra la Tessanda ün plan da quartier. Ha Ella temma cha quai pudess frenar il schlantsch?
Quai sun simplamaing las reglas da gö. Nus vain il terrain a Valchava illa zona da cumün A, ingio chi dà simplamaing prescripziuns. Causa la dimensiun da l’edifiz sto il cumün elavurar quist plan da quartier. La dumonda per far quel vaina inoltrà a las autoritads cumünalas fingià avant la preschantaziun publica. Nus eschan in quist connex da buna fai, perquai cha fin uossa han tuots signalisà gronda bainvuglientscha invers nos proget.

I nu’s fabricha mincha di üna tessonda. Che sun vairamaing las sfidas d’ün tal fabricat, sper la finanziaziun?
I dà plüs puncts. Tenor mai ston la tessonda e la butia fuormar ün’unità. Nus nu pudain prodüer in üna zona d’industria e vender ils prodots in üna bella butia in cumün. Quai sto esser al listess lö. La clientella sto pudair guardar, udir e savurar ingio e co cha’ls tessüts vegnan creats. Uschea as s-chaffischa emozion e colliaziun tanter claint, lavur e prodot. L’artischanadi sto esser visibel. Quai dà eir credibilità a nossa lavur – la clientella vezza cun agens ögls co cha’l prodot vain tessü e cusi. La segunda specialità es sgür il spazi. Ils talers da lain sun gronds, pac movibels ed i sun dad ot. Perquai cha nus nu vulain avair massa blers talers in ün local, stuvaina far plüs lavuratori, e quai dovra piazza. Ed il terz punct special es amo la glüm. Sco in üna manufactura d’uras, as dovra eir in üna tessonda buna glüm dal di, specialmaing cun tesser stoffa naira o alba. Per avair il cler dal di dovra grondas fanestras.

Ella ha raggiunt dal 2023 insè l’età da pensiun. E listess, quist proget less Ella amo trar tras fin al giubileum da 100 ons da la Tessanda dal 2028?
Eu less ed eu stögl restar landervia – eir per dar sgürezza a l’interproget, a la planisaziun ed a las persunas invoutas. Quist fabricat lessa amo trar tras, ma lura esa finì! Eu sun ferm persvasa cha cul nouv abitacul sarà il survivor plü simpel pella Tessanda, perquai cha nus saran plü visibels. Güsta ün fabricat da Zumthor porta eir nouva glieud, voul dir novas persunas chi saran interessantas pella Tessanda sco clientella, per exaimpel amatur d’architectura e da design. Ed a la fin dals quints craja chi sarà plü simpel da chattar üna

successiun per meis post, scha nus vain quista nouva infrastruttura.

Che sta vairamaing ad Ella personalmaing talmaing a cour pro quista Tessanda?
Meis genituors vaivan üna fabrica da tschiculatta. Da prodüer e crear alch culs mans, quai m’ha adüna fascinada. Da verer lura quia in Val Müstair che cha quistas tessunzas san e fan tuot, co cha’ls talers clingian e cloccan, quai es simplamaing fascinant. Lura am sta ferm a cour la promoziun da las duonnas, ün tema chi m’occupa professunalmaing daspö ons. In quists ultims ons, m’occupond da tuot la tematica, n’haja scuvert cun agüd da litteratura, quant importantas cha las textilas sun stattas pel svilup da l’umanità. Da quai, blera glieud nu s’es consciainta, bler savair es svani. La Tessanda ha mantgnü il savair e til sviluppa inavant.

Tesser a man cun talers da lain in üna val dalöntschi davent dals centers – schabain chi’s pudess cumprar online e per pacs raps mincha toc tessü. Ha la Tessanda Val Müstair insomma ün avegnir?
Cler, uschi glü nu fessan nus tuot quista lavur! Natüralmaing cha nus prodüain per üna nischa. E là restaina eir. Nus nu fabricchain üna nouva Tessanda per crescer ferm illa produenziun, ma simplamaing perquai cha nus vain stuvü chattar üna soluziun culla chasa veglia, ingio cha nus eschan aint uossa e chi’d es massa pitschna, ümida e malpratica. Cul nouv fabricat tschüffa l’instituziun novas pussibilitads, per exaimpel cun organisar cuors e guidas e spordscher ün café. Impustüt daraja lura a Valchava ün lö per dar valur ad ün enorm important artischanadi da duonnas.
Intervista: David Truttmann/fmr

Nouv schlantsch per la Tessanda Val Müstair

Maya Repele (66) es daspö l’on 2018 presidenta dal cussagl da fundaziun da la Tessanda Val Müstair. L’on 2019 ha l’economia güsta eir surtut da manar la gestiun da l’instituziun chi exista daspö l’on 1928.
Illa Tessanda Val Müstair vegnan tessüdas textilas da tuot gener sün talers da lain: süaintamans, tapets, schals, tendas, scussals etc. L’impraia dà lavur a var 20 collavuraturas (tes-

sunzas, cusunzas e personal d’administraziun). Id es hoz l’unica manufactura professiunala da tessonda in tuot la Svizra.
Davo ons plü difficultads da la Tessanda Val Müstair, ha l’economia oriunda dal chantun Turich, portà nouv schlantsch ill’instituziun, ella ha reorganisà il manaschi ed etablì la manufactura in ün segmaint da tessüts d’ota qualità. Dūrant seis temp sco

mainagestiun ha la Tessanda tanter oter guadagnà il premi dal public dal Prix Montagne (2020). Cun ün’aigna creaziun per ün scussal da grillar ha l’impraia guadagnà or pro’l «European Textile & Craft Award 2024». Ed impustüt es la gestiun da la Tessanda Val Müstair – tenor aignas indicaziuns – daspö l’on 2021 darcheu profitabla, schabain in üna dimensiun modesta. (fmr/dat)

Il proget cun Zumthor

Bod 70 ons es la Tessanda Val Müstair statta dachasa immez Sta. Maria, in ün’anteriura chasa paurila. Ma il lavuratori es i’l fratemp massa stret ed il chasamaint dovress urgiaintamaing üna sanaziun radicala. Impè da tour per mans quella renovaziun, s’ha il cussagl da fundaziun decis per il pass curaschus: fabricchar a Valchava üna nouva Tessanda concepida dal cuntschaint architect grischun Peter Zumthor. Insembel cun

quel ha l’instituziun preschantà la mità d’avrigl 2025 a la publicità il proget chi vess lura da gnir realisà fin dal 2028, pel 100avel giubileum da la Tessanda. Previs es ün abitacul da lain cun grondas surfatschas da vaider. Quel as rechattess lura immez Valchava, güsta sper il sviamaint. Ils cuosts approximativs importan 7,5 fin 10 milliuns, e quels less la fundaziun finanziair per gronda part surdonaziuns. (fmr/dat)